

His



36992

kat.komp.

H

Mag. St. Dr.

P

Polonia.

Adf-
tola con

ora fraudulentiam scripti editi
sub tit. Monita privata loc. genu,
Nivae recusa. 1616. x.

Teol. 3086



XXIV. 5. 7

ILLVSTRIS-
SIMI AC EXCELLEN-
TISSIMI DOMINI

IOANNIS COMITIS AB
OSTROROG, PALATINI POSN:
SENATORIS REGNI POLONIÆ
PRIMARI.

AD FILIOS ADMONITORIA
EPISTOLA.

*Contra fraudulentiam scripti editi
sub Titulo*


Monita Privata SOCIETATIS JESV.

PRIMO QUIDEM LEOPOLI IVSSV
ILLVSTRISSIMI AC REVERENDISSIMI
DOMINI, D. IOHANNIS ANDRÆ PROCH-
NICKI à Prochnik D. G. Archiepisc: Leo-
polien: Administratoris perpetui Abbatiz
Sieciechovien: &c. &c. edita: nunc
verò, magis correcta
Nissæ recusa.

*Imprimebat AUGUSTINUS GRÜNDER,
Anno M. DC. XVI.*

36.992

I



ILLVSTRISSIMO
ET EXCELLENTISSIMO


DOMINO,

D. IOANNI COMITI AB

OSTROROG, PALATINO POSNANI-
ensi, Dn. Observandissimo,

IOANNES WIELEVICKI

*SOCIETATIS IESV Collegij Leop. Rector
perpetuam Fœlicitatem.*



Um ante mensem ILLma D. V. ex Aula
S. R. M. discedens in Russiam, Leopolim
divertisset; Epistolam ad Filios suos scrip-
tam, ILLmo ac Rdmo Leopol. Archiep.
communicare voluit. Amicitia nimirũ,
eamquẽ conservans familiaritas, cum eo-
dem ILLmo ANTISTITE, in exteris adhuc nationibus
contracta, quàm sanctissimẽ cultam, nunc auctam voluit;
id suadebat: & observantia in S. M. Ecclesiæ præcepta, ju-
bebat, ut scriptum illud, quod opportunẽ Theologicis do-
ctrinis respererat, non prius ad alios, ne ad ipsos quidem
Filios mitteret; quàm PASTORI suo, ac in spiritualibus
PATRI, censendum & examinandum daret. Censuit is,
approbavit, collaudavit, & descriptã Epistolam, forsitan
inconsulta ILLma D. V. mihi, ut prælo subderetur, tra-
didit. Nec ego dubitare potui, Divinæ gloriæ, saluti proxi-
morum, & nostræ SOCIETATI, ad tuendam existima-

tionem, perutilem fore. Tanti enim viri maturum iudicium, & gravis ad Filios, quos ad Dei gloriam, & Reip. bonum, educatos desiderat, admonitio, apud quem, illū, quem debet, authoritatis locum, non habeat? Et certe ILLma D. V. minimè fallitur, dum de SOCIETATIS nostræ, sincero, in omnib⁹ studijs & actionibus, progressu, ita sentit. Nos vicissim, quod vnum possumus, apud DEVM Opt: Max: precibus id agemus, ut hoc in nos: sed quid in nos? imò in S. Catholicam Fidem, & Ecclesiā, præstitum officium, ILLma D. V. amplissima Benedictione, compensatum velit. Mihi verò, ut spero, ab ILLma D. V. venia dabitur, quòd ea inconsulta, ILLmo ac Rdmo ANTISTITI NRō, in re adeo gravi, ac utili, morem gesserim. Is enim tantum, mutux amicitix, tribuendum putavit, ut sibi etiam licuisse, pro pastoralis in suos cura, ac solitudine existimaverit, ne scriptum publico, animarum, bono, adeo accommodatum, & astutia, ac malignis satanæ, per Monitorem suum, consilijs amoliendis firmiter oppositum; privatis tantum admonitionibus, terminari pateretur. Dominus ad divinam suam Gloriam, & Ecclesiæ, ac Reip. ornamentum, & auxilium, Illustrissimam D. V. cum tota Familia, diutissimè nobis omnibus, servet incolumem. Datum Leopoli. 23. Octobr. Anno salutis 1615.





IOANNES COMES AB OSTROROG, PALA-

TINVS POSNANIENSIS, NICOLAO

Capitaneo Drohoviensi, & STANISLAO

Comitibus ab Ostrorog, Filijs suis charis-

simis, salutem & Paternam

benedictionem.



Um ad singulos vestrum, Filij charissimi, haftenus multoties mihi, pro varietate rerum, & temporum, scribere contigerit; nova sese obtulit occasio, quæ me, & ad utrumq; communem epistolam perscribere impulit, & ita scribere; ut & reliqui Fratres vestri Filij mei, è quibus etiam tertium Ioannem in Societatem studiorum, & peregrinationis vestre, statim missurus sum, simul vobiscum paterna admonitione, à gravi animarum vestrarum periculo, præmuniantur. Scripseram quondam ad te Nicolæ, natu majorem Filium, puerum tunc in Academia Zamosciana, literis operam dantem, Epistolam; qua, quid Deo, Patriæ, Regi, ac omni virtutum, & religionis ipsius

cultui deberes, luculenter cōmemoravi: neq; dubito,
tuis & Fratris secundo geniti, manibus illam teri:
& minoribus fratribus, ut idem faciant, te & du-
cem, & authorem, tam præcepto, quàm exemplo fore.
Atq; ita statuo si præcepta ibi contenta, tu tuq; ex-
emplo minores mei Filij, Fratres tui observaveritis
(uti quidem debetis) in Deum, & homines, vos non
injustos fore. Sed me vehementer commovit ma-
lignum quoddam scriptum, nuper in lucem ab ano-
nymo quodam editum, in Societatem JESU directum,
sed per illius latus toti Catholicæ rei damnosum, eoq;
ducens, ut qui illi cor apposuerit, in summum animæ
periculum, sine ulla sit impacturus, dubitatione. Duo
sunt, in quibus Ecclesia Christi, ejusq; athletæ desu-
dant: in quibus circa salutem hominum precioso san-
guine Christi redemptorum, promovendam enitun-
tur: Fides & opera. Sine fide impossibile placere
Deo: sed hæc sine operibus mortua. Non qui dixerit
mibi Domine Domine, intrabit in Regnum cœlorum,
sed qui fecerit voluntatem patris. Omnes intendit
Diabolus vires, ut vel utrunq; in nobis corrumpat,
vel alterutrum. Parum distat infidelitas cum ne-
quitia conjuncta, ad damnationem, à sola infidelitate
& à sola nequitia. Et conjuncta hæc ad inferos de-
ducunt, & separata: multitudo peccatorum gravi-
tatem

tatem pœnarum auget, sed & paucitas ab inferno non liberat, in quo vel minima damnatio, gravitate pœnæ omnem humanæ rationis captum superat. Et certè nescio, an non plus pœnarum mereantur, qui dum fidem bonam vel habent, vel saltem profitentur, mala tamen operantur; quàm illi, qui lumine fidei privati, extraq; Ecclesiam constituti, in peccatis voluntantur: cum servus sciens voluntatem Domini, & non faciens illam, duplici vapulatione condemnnetur. Sed hæc Theologus relinquamus. Quanquam tu mi STANISLAE, qui ab ipsa pueritia, clericam vitam professus es, etiam in Theologicis præ cæteris fratribus, versari debebis. Redeo ad propositum vestri præmonendi, ne in lapidem hunc offensionis noviter ad præcipationem animarum, eorum, qui fortè incautiùs iter salutis persequuntur, à Diabolo obtrusum impingatis. Et si omnes S. Matris Ecclesiæ administri, totus videlicet sacer ordo, in id à Deo Optimo Maximo vocati, in id à Christo Domino, & ejus Vicarijs ac successoribus instituti sunt, & ordinantur, ut fidem Christi diligenter custodiant, incorruptamque conservent, infideles ad eam inducant, dilapsos reducant, omnibusq; in ea constitutis, & præcepto, & exemplo authores sint, ut fidem suam, per bona opera, manifestam faciant: nihilominus pro diversitate

fitate temporum & rerum, varios Ecclesiasticorum
ordines divina providentia ordinare consuevit: de
quibus, cum multa à multis doctissimis pariter ac
sanctissimis viris perscripta sint, ad illos mihi remit-
tendi estis, apud quos per omnes etates, hoc reperie-
tis, omnibus contra Ecclesiam sanctam, noviter exor-
tis, seu hæresibus, seu schismatibus, semper Deum
novos operarios suos opposuisse. Semper deinde Sa-
tanam, diversis persequendi modis & artibus, novos
athletas Christi, divexasse. Mibi ad vos de SOCI-
ETATE JESU, res erit: quam cum Deus istis novis,
præterito sæculo exortis hæresibus, immediate oppo-
suerit, dici satis nequit, quo odio, quibus ex eo pro-
fectis, & vexationibus, & persecutionibus, adver-
sarij, eos, stimulante Diabolo, persecuti non sunt.
Notiora sunt, quàm ut scribam. Abundè habetis, à
plurimis perscripta. Hoc certè videmus, quod non
tantum ista per Hereticos via, ac tot, & tantis illo-
rum calumnationibus, persecutionibusq; plurimo
sanguine gloriosissimorum Martyrum conspersis, &
per infideles (ad quos etiam ex tenebris Idolatria, in
gremium Ecclesiæ, per doctrinam veræ fidei, indu-
cendos, à sede Apostolica, emissi sunt) continuatis
supplicijs, infinitisq; mactationibus, non tantum de-
pressa & imminuta, hæc gloriosa SOCIETAS non sit,
sed &

sed & in infinitis calumnijs, semper clarior, ac innocentior, in infinitis Martyrijs & mortibus; auctior, ac numerosior, evaserit. Et hoc quidem modo, inimicis salutis nostræ, hanc Christi aciem novam, in Castris Domini, contra exercitus, tam Hereticorū, quam infidelium, in statione oppositam, oppugnavit. Sed cum pietate, eruditione, constantia, ita munitam videret, ut externorum hostium omnes machinas, omnem earum vim, & impetum, auxiliante gratia Dei, semper reprimeret, quod & boni Imperatores, ex arte militari solent, ubi vis retusa est, ad stratagemata se convertit. Insidiatores, in ipsis Castris Christi, querit, & invenit: ingerit in SOCIETATEM odium, suggerit calumnias, modos docet, ut quos per tot detractiones, & obtredationes adversariorum, defœdare non potuit; quos non potuit per tot Martyria, non tantum tollere, sed nec imminuere; eorum per proprios Catholicæ (ut videri ipsi volunt) Religionis cultores, subruere annitatur. Est genus hominum, inter nostros Catholicos, qui licet Catholicos se esse profiteantur, fidemq; Catholicam præseferant, nullos tamen fructus, dignos professione sua, faciunt. Illis præcepta S. Matris Ecclesiæ (imò & Dei ipsius) lusum sunt, atq; jocus. Jejunia, Orationes, Eleemosynæ, puritas vitæ, usus Sacramentorum, frequentatio sacrificio-

crificiorum, Festa & alia, vel omnino non curantur,
vel ita neglectim curantur, ut res viliores, quam
quæ vel ad salutem multum conferant, vel ad dam-
nationem neglecta, protrudant. Immo omnia vitia
in familiaritatem asciscunt: ebrietates, lascivias,
parcitas, obtreptiones, vanitatum omnia genera:
ita ut de die in diem tantum vivant, de Deo, de pie-
tate, de salute animæ, nil cogitantes: vitia vitijs
cumulantes, dies noctibus conjungentes, de die no-
ctem, de nocte diem facientes, atq; edendo, bibendo,
ludendo, Deum ventrem adorantes. Et quod peius
est, non fragilitatis humane vitio, eò delabuntur;
sed habitu ad nequitiam contracto, ad elegantiam
vitæ omnino pertinere putant, fornicationes, stupra,
adulteria, incestus, omniaq; libidinum genera, com-
potationes, per noctes aleis, omniumq; Dei, & Ec-
clesiæ, præceptorum contemptum. Utinam verò sal-
tem ita viverent, & peccatorum suorum indefessa
exercitatione, se solos inferno involuerent, non etiam
scandalo, plurimos corrumperent, irretirent, ac
secum implicarent. Et hi in visceribus S. Matris
Ecclesiæ comprehensi, Catholicos se vocari volunt:
& sunt quidem professione, larvamq; Catholicam in
facie gerunt, sed mortuam fidem, ab operibus bonis
segregatam, habeant necesse est. Digrediendum

mibi

mibi paululum est, atq; de gravi summorum totius
Christianitatis virorum, injuria conquerendum,
quod hoc perniciosum genus hominum, nescio quo au-
thore, politicorum nobilissimo nomine nuncupetur:
cum & politia nobilissimum nomen sit, administra-
tionemq; summorum Imperiorum, Regnorum, Rerum
publicarū denotet, & politici meritò dicantur summi
Principes, qui regnis ac rebus publicis præsident, ac
eorum nobilissimi Administri: adeoq; omnes, qui
quoquo modo ad rempublicam pertinent; non hoc
genus hominum, quod non magis salutem publicam
(quod politicorum proprium est) curaverit, quàm
curat suam: vel sicurare videntur, omnia suis com-
modis metiuntur, nulla justitiæ, (cujus Deus Opt:
Max: acerrimus vindex est) habitare ratione: ita ut
quicquid illis utile aut jucundum videtur, id cum
omni Dei, & hominum injuria, sibi licere putent.
Sed nos ad nostra. Obstare videtur præ ceteris om-
nibus Ecclesiasticorum sodalitatibus istis pseudopoli-
ticis, SOCIETAS JESV; pungunt illos acres in vitia
illorum conciones, de casibus conscientie disquisitio-
nes, disputationes, exercitia spiritualia: omnium
verò maxime, summa Confessariorum in examinan-
dis conscientijs severitas, & diligentia. Irritantur
istis omnibus, & ut hæretici ac gentiles, ob fidei plan-

tationem, vel restitutionem, gravissimè in illos of-
fenduntur, sic non multò minus isti, ob peccatorum
in quibus voluntantur, acrem reprehensionem. In his
generis humani hostis illorum iracundiam, & mo-
vet, & exacuit; propter hæc nocendi libidinem in-
spirat, tela suppeditat: & licet cum infidelibus gen-
tibus, & hæreticis (ut pote qui catholici videri vo-
lunt) eorum circa fidem gravissimos conatus, repre-
hendere nolint, in mores tamen, & vitam aliquid
moliendum existimant. Atq; hoc telum cum hære-
ticis commune habent. Sed & hic SOCIETATIS istius
vitæ puritate, modestia, eruditione, prudentia, in
officijs ad quæ à Deo, & Ecclesia destinati sunt obe-
undis dexteritate obstante, ad figmenta & calu-
mnias convertere se non abhorrent, ut stimulantem sese
Satana, in proprijs affectibus, aliquo modo satisfa-
ciant. Infinita talium conatum, in tot, tantisq;
tam hæreticorum, quàm talium pseudopoliticorum
libris, in SOCIETATEM emisiss, habetis exempla. Sed
nullum unquam simile scriptum, majore nequitia,
conceptum extitit, quàm quod veterator quidam
anonymus, sive hæreticus, sive pseudopoliticus, (licet
ipse & forma libelli, & inscriptione, quam in manu
scriptis exemplaribus, diversa ab hac prælo excusa
habetur, ubi in Hispania ortum, in Italiam deinde,
ac de-

ac demum in Poloniam delatum scribit, catholicus
haberi vult) per modū famosi libelli, in lucem edidit,
atq; monitorum privatorum, SOCIETATIS JESV, ficto
eo quidem nomine, mendaciter insignivit. Non potuit
ille, in vita Sanctæ istius SOCIETATIS sodalium, quid-
quam impurum, quidquam injustum invenire, quod
ipsa veritas non statim refelleret, sed cum à cæpto,
(urgente Satana, & incredibili nocendi SOCIETATI
ardore obcæcante, & pruritu inflammante) ruendu
illi quoquo modo, ad illam subruendam videretur,
vnius hypocrisiæ reos agere, apud orbem Christianum
constituit. Ne verò fides deesset cæptis, non alterius
alicujus nomine, hæc tanta scilicet secreta edidit,
sed tanquam ex penetralibus ipsius SOCIETATIS de-
prompta prostituit. Satis superq; plurimi, qui jam
illi scriptis responderunt, sola mendaciū justissima ob-
jectione illius, huic ante hac inaudita malitiæ, re-
sponsum esse statuerunt: cū certum sit, talia mo-
nita, nunquam in SOCIETATE visa, aut audita esse,
nec palam, (quod & ipse innuit) nec secreto, & inter
paucos, quod mendaciter confingit. Neq; ad conficta
mendacia, aliter unquam melius responderi aut po-
test, aut debet. Sed me ad vos charissimos Filios
meos, quos ad Gloriam Dei, ad Sanctæ Matris Ec-
clesiæ, tum Patriæ nostræ, ejusq; Serenissimi Regis ac

Domini nostri, ac Successorum suæ Majestatis, obsequia genui, & institui, scribentem, sunt quæ hortentur ut nonnihil, nequitiam istius scripti discutiam, ne verisimilitudine falsissimarum rerum, juvenile judicium vestrum, in scandalum aliquod, cum periculo animarum vestrarum impingat. Sed in verso ordine mihi agendum est, & aculeus primo, quem in cauda venenatus scorpio iste gerit, eximendus, quo exempto, totum corpus illius monitorum facile marcescet. Cum enim mendacia sua, nullam fidem habere posse certò animadverteret, si in disquisitionem aliquam venire, quoquo modo possint, postquam illa pro libidine, & pruritu suo congesisset, tali corollario, loco conclusionis condecoravit.

Hæc privata monita, (inquit) diligenter penes se servant Superiores, & paucis idque gravibus ea Patribus communicent, ex illisque instituant alios, quomodo serviant cum fructu SOCIETATI, neque ut scripta ab altero; sed ut ex peculiari prudentia deprompta, alijs communicent.

Quod si, quod absit, in manus externorum, hæc monita veniant, quoniam sinistrè ea interpretabuntur, negentur hoc sensu esse SOCIETATIS per istos cõfirmando è Nostris, de quibus certò scitur, hos talia ignorare.

Opponantur his privatis Monitis Generalia Monita, & Ordinationes impressæ, aut scriptæ, his privatis contrariæ.

Hæc

Hæc tria puncta, Epilogi istius, excutienda nobis
sunt: nam quartum, & ultimum, levius est, quàm ut
dignum sit, cui manus admoveatur. Quod prius
quàm facio, considerationem quandam, hac in parte,
meam, vobis communicandum statui. Philosopho-
rum Principis, Aristotelis Stagyrîtæ discipulus, &
ipse summus Philosophus Theophrastus, inter plurima
maximi ingenij, maturi judicij, ac summæ eruditio-
nis monumenta, conscripsit librum characterum,,
cujus parva pars, injuria temporum, ad nostram æta-
tem pervenit: in quo ex causis physicis, & physio-
gnomia, omnium internarum inclinationum anima-
rationalis, externa signa, in motu corporis, & actio-
nibus descripsi: quales videlicet nature ad avaritiã
prone, externi motus sint: quales gestus, qualia ver-
ba, quales actiones, sic de superbia, sic de lascivia,
sic de crudelitate, sic de omni genere internarum ani-
mæ inclinationum. Et quidem, qui Christiana pie-
tate ista accipiat, & memor humane fragilitatis re-
cordetur, nostra quidem ex parte, nos omnia omnium
peccatorum, cum peccato originali semina ingenta
habere, eaque inclinationes ad malum, & pecca-
torum ipsorum patratiõem, consequi posse: sed ex
parte Gratia Dei, tot tantaque ad resistendum pec-
catis, & ad ea, innatis illis malis inclinationibus,
remedia

Hæc

remedia nobis suppetere; non facile ex characteribus Theophrasti furem, aut raptorem judicabit (hoc enim omnium avarorum est proprium) in quo characteres Theophrasti ad avaritiam, inclinationem monstrabunt: nec statim superbum, aut luxuriosum, aut crudelem, in quem iidem characteres videbuntur quadrare; sed oculo sinistro characteres Theophrasti respiciens, ad Gratiā Dei, contra tales inclinationes nos armantem, dextro oculo se convertet. Sed, qui levi iudicio, & temerè, sola Theophrasti subtilitate delectatus, ex talibus externis characteribus statim, etiam vitij quemlibet arguere non dubitavit, et quicquid ob naturæ depravatam qualitatem, in dispositione ad malum, nobiscum cum peccato originali, natum est, id in habitu, & re ipsa in quolibet inveniri decreverit; is toto terrarum orbe, neminem innocentem inveniat: præter hos, qui sine peccato originali, quod omnes ad omnia peccata inclinationes in nobis consequuntur, ipsas verò isti, quos diximus, characteres consequantur necesse est, nascerentur. Itaque incauti Theophrasti Lectores, quicquid dicant viri innocui, & qui Gratia Dei suffulti, per virtutem ex illa, manantem, omnes inclinationes malas etiam per tentationes diaboli, acrius intensas, vicerint, illi eos nihilominus omnium scelerum, ex annotatione

ribus
enim
eres
stra-
cru-
qua-
ire-
ones
l, qui
itate
tim,
quic-
posi-
na
eniri
nno-
ori-
ones
mus,
utur.
cant
irtu-
alas
vi-
can-
atio-

notatione externorum characterum condemnant. Ex
quo fundamento, existimo istum bonum veteratorem,
sem sibi Iesuitas in confictis calumnijs, quasi chara-
cteribus, tum maxime sine refutatione, & purgandi
se facultate, Hypocriseos condemnaturum, si hos
ultimos tres characteres, in epilogo suo positos, impri-
mere mentibus lectorum posset; Iesuitas scilicet, in
quos ficta monita conscribens, tot mendacia, tan-
quam characteres hypocriseos, congesit, parata ha-
bere, hæc tria, quæ opponant cuilibet, illis hæc monita
obijcienti, ut cum ad aliquod horum, bona fide, ad
purgationem suam deveniant, semper habeat vete-
rator, quod dicat, scilicet: An non videtis illos, hos
cavillos ijsdem monitis ad scripsisse? atque ita suis
figmentis auctoritatem astruat, illorum verissimis
refutationibus demat. Sed non cavillos esse mox sciet
veterator. Commentemur in ista sue conclusionis
triapuncta. Ad primum igitur, ubi dicit, ut hæc
monita diligenter serventur &c. ita commentamur.
Per hoc punctum, hoc ingestum infixumq; vult vete-
rator, animis lectorum, hæc monita valde secreta
esse, cautissimè asservari, non nisi paucissimis commu-
nicari, ut pote quæ tota ad fallendum, & per falla-
ciam rem faciendam, sint accommodata, imò ut nec
isti noviter conscij ea inscripto esse olfaciant, quibus

C hæc

*hac per Superiores communicata sunt, neque ex pre-
meditata aliqua deliberatione totius secretioris con-
siliij SOCIETATIS deprompta; sed ex tempore & pecu-
liari eorum, à quibus hac accipiunt, prudentia pro-
fecta. Ad secundum, ubi dicit. Quod si, absit, in
manus &c. Jam putavit miser veterator per pri-
mum conclusionis suæ punctum satis consultum esse, ne
omnino fides negationi figmenti istius habeatur, si
negent vel omnes ex Societate separati, talia monita
in Societate, haberi & asservari, ut pote qui omnes
negaturos, inter eos annumerandos convicisse se pu-
tet, quos ab alijs scilicet deceptos, re vera fingit igno-
rare: ut licet vel integra Collegia, uno ore id ne-
gent, semper habeat, quod incautis ingerat, esse sci-
licet alibi istos, qui hac secreta cognita habent, &
alijs modo supradicto ignorantibus communicent: ita
ut nisi totius orbis sodales SOCIETATIS JESV in unum
locum congregati negent, hac apud se scripta haberi
& servari, fidem negantibus apud deceptos à se sim-
pliciores nullā fore, ac si vel unus ex omnibus absens
sit, vel saltem dicatur, illum unum illa scire, affir-
mare possit. Astutia tali Authore digna. Sed quàm
maliciofa, quam vana, & vos licet juvenes adhuc
sitis, facile videre potestis. Ille miser hoc funda-
mento, ut putavit, jacto in hoc secundo puncto, ut*

Hypo-

10
Hypocrisim Iesuitarum mentibus legentium insigat,
per quam solam (cū aliter nequeat) fidem illorum
apud orbem terrarum infringere satagit, fingit illos
tales esse, ut mendacia non vitanda, sed celanda exi-
stiment: Et cum aliquid non nisi per negativas (men-
daces) diluere necesse est, eos hypocriticè per alios, id
facere solere, ut verbi gratia in hoc. Putavit ille jam
se effecisse, ut nullo modo credatur, talia monita non
esse in rerum natura: Nunc vult hoc Iesuitis inurere,
quod cum illis neganda hæc sint (si totius orbis odium
incurrere nolint) atq; omnino negando mentiendum,
illos mendacium hoc dividere, in mendacium secre-
tum, Et apertum: Et secretò quidem mentiri illos,
qui hæc monita asseruant, Et alijs (voce tamen, non
scripto, Et quasi non ex arcano eorum consilio; sed ex
peculiari prudentia deprompta) communicant, ad
apertum verò mendacium eos deputari, qui revera
taliamonita nusquam esse existimant, Et licet sint, Et
in secreto asserventur, cū tamen id ab illis ignore-
tur, sine peccato scilicet, etiam cum juramentis, Et
execrationibus negare possint, Et non peccare. Nil
verò illos Superiores curare, quod saltem ipsi per alios
ignorantes mentiantur: atque ita non curare offen-
sam Dei, omnia videntis, modò hominum oculos,
Et notitiam effugiant, quod hypocritarum est. Atq;
ita

ita putat miser veterator, ut per primum punctum, negationi fidem se prorsus sustulisse, sic per hoc secundum, Iesuitas hypocriseos se convicisse. Intertio. Opponantur &c. unica veritatis arma ipsam scilicet veritatem, ne ejus mendacijs opponi possit elevat. Et cum in tenebris falsas merces suas, mendacij & tenebrarum pater, incautis lectoribus, obtrudere nitatur, diligenter cavet, ne fenestra lucis divine ad detegendam falsitatem suam, ad detegendam animarum decipulam, aperiatur: ut videlicet cum insimulata SOCIETAS publicas leges, & constituta sua in lucem edita, ab Ecclesia confirmata, omnibus sodalibus ad sanctè & regulatè vivendum, inculcata, protulerit, & confictis istis mendacijs opposuerit; id ex secreto isto scilicet consilio, facere dum existimetur, fidem non habeat, talibus & non alijs se legibus vivere: diu scilicet conclusum esse, ut si forte in lucem ista secreta monita erumpant, ad illa eludenda ista publica opponantur. Et quid aliud faciendum esset; Ista quidem omnia quæ scripsit veterator, conficta sunt, neq; unquam talia esse vel fuisse probabit: è contrario, quæ dicit suis mendacijs opponenda, vera sunt, authore spiritu sancto suggesta, à sancta Matre Ecclesia approbata, tot seculis palam in luce, atq; oculis totius orbis terrarum, observata. Et quæ
malitia

malitia talibus detrabere? Quæ stultitia operibus Dei, contravenire velle? væ vobis hypocritæ, dicit Dominus: et nullum peccatum ipse, dum in terris versaretur, majori zelo est prosecutus. At, quale væ isti tam hypocritæ, ut arguit iste quisquis est, SOCIETATI? quam Deus ornavit, tanta multitudine præstantissimorum in vinea sua Operariorum; tanta latitudine, in quibus vineam Domini, vel plantant, vel purgant, orbis terrarum regionum; tot gloriosissimis martyrijs. Nisi fortè anonymus noster, væ istud in laborum magnitudine, & martyriorum atrocitate consistere putet, per quæ sempiterna vitæ æternæ gloria acquiritur, & cum pseudopoliticis, summum bonum, in voluptatibus hujus fallacis mundi, ad inferos detrudentibus, constituat.

Hoc aculeo, ex cauda virulenti istius scorpionis, exempto, detecta, videlicet, istius fictorum monitorum epilogi fraude, ipsa omnia monita, non à Iesuitis, ut iste anonymus, fortassis fore spem habuit; sed à sancta Matre Ecclesia, omnibusq; Deum timentibus Catholicis, falsitatis condemnantur. Vos charissimi Filij, ea, ut omnes falsitates, si fortè in ea incidere contigerit, abominemini. Et ut à fallacia nova fraude contexta, vobis cavetote, non figmentum tantum falsissimum, sed & perniciosissimum est. Hoc

enim per hoc instrumentum suum agit Diabolus, ut
sodalibus SOCIETATIS, tanquam hypocritis, in odium
adductis: ab eorum salutaris conversatione, homines
avertat: ne conciones in vitia, & peccata directæ ab
illis audiantur, ne scholæ illorum, quæ pietatis of-
ficina sunt, frequententur (quæ tot doctos, & sanctos
in vinea Domini Operarios, ad destruenda opera
Diaboli emittunt, magno Diaboli, ac irrecompen-
sabili damno) ne ad confessiones peccatores ad illos
accedant, ne pseudopoliticorum scilicet numerus,
per prudentiam, & soliditatem Confessariorum, im-
minuatur: sed potius ut ipsi pseudopolitici faciunt,
vel nunquam, vel raro confiteantur, & prætere-
tatem Confessarium adhibeant, qui potius illis, sine
molestia, qualiter taliter confitentibus, aures præ-
beat; quam exaggeratione peccatorum (quæ illi et-
jam confitentes deferere in animo non habent) &
examine conscientie molestus fiat: denique ne si multi
ad puritatem vitæ christianæ, bona opera, Dei, &
Ecclesiæ præceptorum observantiam, devotionem
operâ SOCIETATIS JESU, ex castris peccantium, tran-
sirent, pseudopolitici ad paucitatem redacti, eviden-
tius in oculis hominum, cum suis peccatis prostarent,
qui nunc multitudine sui similibus, se putant tectio-
res. Insuper dum librum hunc lego, relego, voluo,
revoluo,

s, ut
dium
nines
te ab
is of-
nctos
opera
ppen-
illos
erus,
, im-
iunt,
terea
, sine
præ-
li et-
) &
multi
ei, &
onem
tran-
iden-
rent,
etio-
voluo,
voluo,

revoluo, etiam si non ficta omnia essent, ut sunt; nil
tamen quod meritò crimini, per se, dari possit, inve-
nio. Quid in primo monito damnandum? etiam si
tale datum re vera fuisset, nisi quòd anonymus id
quod bono fine benevolentiae captandae gratia ab om-
nibus, qui ratione reguntur, fieri deberet; à Iesuitis
lucris causa fieri, calumniatur: quod etiam nobis, non
tantum illis negantibus, statim evanescit. In se-
cundo malignior est, in politica illos consilia, & Prin-
cipum adulationes inducens. Sed & in hoc plurima
licita, vel per se, vel ad majora scandala evitanda,
omnia verò, quæ probari ab ipso, non possunt. In
tertio ridiculus nugator est, vel id solum vanitatem
hominis arguit, quòd cum de egenis dominis moni-
tum instituerit, eorum operas ad talia applicet, quæ
vel divitibus gravia, & onerosa, esse possent. In
quarto ut in secundo fuit, iterum malignior est: nulla
tamen sunt, quæ non licitè tantum; sed decenter et-
jam fieri possent, etiam si verè monita essent. Re-
liqua & non constant sibi, & nullo modo probari
possunt. In quinto, in solam invidiam implicare vult
SOCIETATEM, apud reliquos Regulares, & licitam
æmulationem, in invidiam trabens, illicitam supplan-
tationem innuit, additis malitiæ suæ flosculis. In ali-
quot sequentibus ubi de viduis, et earum liberis agit,
mire

mirè se torquet, omnia miscens, fingens, traducens:
sed si rem spectemus, ad castitatem, Eleemosynam, de-
votionem persuadendam, hoc monitum pertineret.
Quod an non & ipse Divus Paulus monuit? unum
malitiæ anonymi flosculum, stultitia olentem, paulu-
lum odoremur, quando SOCIETATEM canino dente
mordere volens, scribit: ad viduarum sensualitatem
accommodata, multa fieri debere, cautè tamen &
secluso scandalo. Itane suo pede omnes metitur ano-
nymus? dum SOCIETATEM ita ut ipse facit, (si modo
& hoc facit) vitam instituere existimat, ut non tam
peccata vitent, quàm scandala. Malitia est arguere
innocentes: stultitia putare hoc non animadversum
iri, viros pios, qui caverent, ne quid cum scandalo
fiat (quod quidem ipse in hoc monito scribit) non
multò magis cauturos ne fiat cum peccato, ex quo
scandala originem trahunt: opinatur ille, pro suo
modulo, scandala tantum, quæ in oculos hominum in-
currunt, ab illis vitari, non multò magis peccata,
quæ oculos Dei, non effugiunt, & scandalorum unica
sunt causa. Utinam verò si peccata non vult, saltem
scandala vitaret, ipse anonymus. Vana sunt alia
plurima, falsa omnia, quibus examinandis, ineptum
sit tempus terere, & sufficiat mihi, vos Filios meos
vanitatum, malitiæ, falsitatis istius admonitos à me
esse:

esse : ut cognita veneni istius qualitate , tuti ab eo
existatis. Perstringam tamen vestri causa , brevi-
ter cetera. In nono monito, non animadvertit ano-
nymus nil contineri, quod non ad Eleemosynam perti-
neat, & non SOCIETATEM JESV se perstringere, sed
JESVM ipsum Christum, toties talia intonantem, ubi
parare jubet amicos ex mammona iniquitatis, ut re-
cipiant nos in tabernacula sua, ubi jubet vendere
omnia, & sequi se, ubi jubet thesaurizare thesauros,
quos tinea non consumit : & quid aliud in hoc monito
traducit? JESVM traducit, non Iesuitas. Reliqua
monita de dimissis ex SOCIETATE omitto, contra qua
optimè ratiocinatur admodum Reverendus Pater
Ioannes Argentus Provinciarum Regni Poloniae, &
Magni Ducatus Lituaniae, non ita pridem VISITA-
TOR in Epistola sua, cujus inscriptio est, ad SIGISMUN-
DUM III. Poloniae & Sueciae Regem potentissimum &
Magnum Lituaniae Ducem &c. Epistola &c. Cra-
coviæ, hoc ipso anno, impressa. Quibus monitis de
dimissis, intersertum est monitum, de juventute asci-
scenda, & fovenda : quasi verò, non omne genus mor-
taliū, nō tantum hæc SOCIETAS Sodales sibi exoptet
excellentissimos, & maximè ad finem, quem proposi-
tum ratione vocationis suæ habet, idoneos; quasi etiā
non universalis sit omnium ratione utentium, con-

D

suetudo,

suetudo, quos ad se allexerint, benevolè & humani-
ter tractare. Nodum in scirpo quærit miser anony-
mus: & cum Zoilo, omnia mordere statuit, nil, modo
id præstare possit, erubescens; sed in omnibus falsus,
& ridiculus. Quandoquidem, & in altero monito, de
Monialibus, ridiculè agit; quasi verò non liceat, quas-
vis Eleemosynas accipere, dum modo ad Gloriâ Dei,
& proximorum salutem convertantur; quod per So-
CINETATEM JESU præstatur fidelissimè. Penultimum
monitum, quid nisi gratitudinem in bonè meritos
continet? quam traducit merita malè formando, &
malitiosè describendo; sed gratitudinem jubet, quam
& Deus jubet; sed mercenarios dignos mercede in-
fert, quod & Dei præceptum est. Vltimum moni-
tum, & impudens est, & sibi non constans, ipsumq;
sine otpugnatore corruit. Habetis meam de hoc
pernicioso scripto sententiam, sed & ipsi per vos li-
cèt luvænes, si ejus & materiam & formam conside-
raveritis, ineptum, rude, indoctum, non modò viris
doctis, & plurimis, sed uno bono Grammatico, non
tantum Theologo indignum, judicabitis. Tot eru-
ditissimi viri, qui orbem terrarum, innumerabilibus
scriptis, exornârunt, tam ineptè scriberent? tot mar-
tyrj glorificati SOCIETAS, tam impiè suos Sodales
ad hypocrisim institueret? absit hoc homini Catholico,
etiam

etiam cogitare : unus aliquis , vel pauci malitiosi ,
magis quam docti , & sapientes confinxerunt , hunc
stultum , & vanissimum libellum , & quidem famo-
sum libellum , licet is , ut manu scripta exemplaria
habent , in Hispania , ubi omnia sobrie aguntur , or-
tum suum haberet . Quem dum imprimunt , ut scissēs
melius prodant ; adjungunt testimonia falsa , Ita-
lorum , & Hispanorum , explosa , & refutata . Nam
quod de nostris Cardinalibus Radzivilo , & Macie-
jowio , impresserunt ; ea falsa esse , etiam mihi con-
stat . Ut & ea quæ Miscovio , Episcopo Cracoviensi ,
affinguntur ; maximè verò quæ consanguineo nostro
SOLICOVIO , viro sanctissimo , Archiepiscopo Lepo-
liensi , quocum Ego familiarissimè , annos plurimos
vixi , viro SOCIETATIS JESU amantissimo , qui primus
eos , Leopolum induxit , & ad mortem usque fovit :
& quo conscio , Ego cum Matre tua , Nicolæ Fili ,
ad Collegij erectionem futuram , primum omnium ,
Sortium Matris tue , fœminæ lectissimæ Catha-
rinæ Mieleciæ , in villis Podusilnæ & Baczow fun-
dationem feci .

Sanguis mihi , & vita cum
optimo illo Archiepiscopo communis erat , quomodo
celasset , cum consanguineo dilecto , & amico con-
fidentissimo , hanc suam de SOCIETATE , quam
isti fingunt sententiam , vel tunc saltem , cum

illi aperirem, me illis ad futuri Collegij foundationem,
aliquid conferre velle? qua simulatione vir sanctus,
eos Leopolim ad Cathedram suam induceret, de qui-
bus tam malè sentiret? Abhorrete à mendacijs ta-
libus charissimi Filij, sed & tales pseudopoliticos, qui
talìa, ut & reliqua vitæ suæ vitia, non coram Deo,
nec coram hominibus erubescunt, diligenter cavete.
Habetis paulo antè, in hac ipsa Epistola descriptos,
faciles cognitu sunt, ex fructibus eorum cognoscetis
eos, noscite illos, & cavetote, ut non vestri modò,
sed generis humani perniciem. SOCIETATEM JESV,
ut fideles Dei operarios, & ejus contra Ecclesiæ, se-
culi nostri, hostes, emissarios & propugnatores colite,
& diligite. Ego ipse, cum ex hæresi, ad sanctæ Ma-
tris Ecclesiæ gremium, redirem in manibus Reve-
rendi Patris bonæ memoriæ Christophori Varsavitij
SOCIETATIS JESV Theologi, sarcinam peccatorum,
unà cum hæresi deposui: ego cum gravissimis, pari-
ter, & mea quidem opinione, sanctissimis viris,
Petro Scarga Concionatore Aulico, & Ioanne Cona-
rio nuper defunctis, constantissimam amicitiam
colui, per illos plurimum conscientiae, & salutis meae
consulens: Et nunc multos in SOCIETATE ista amicis-
simos habeo, quos dum vivunt, non nominabo. Ante
annos verò tredecim, cum illo gravissimo morbo, vel
morbo-

morborum potius quadam colluvie, (quod & tu jam, Nicolaë Fili, recordari potes) jam jam moriturus viderer, Medicos Leopoli, ad curationem ægri corporis, evocando, eodem curru Patrem Ioannem Ponetium, qui animæ meæ salutis consulere, advehi jussi, in illiusque manibus, animam Deo Creatori meo, offerre, illumq; salutis meæ custodem habere, volui. Nec existimate, me abhorrentia aliqua à SOCIETATE inductum, vos Filios meos, extra Collegia illorum, in re literaria instituisse, sed veras causas, quæ tres sunt, habetote. Prima: quòd cum SOCIETATIS finis sit, & institutum, circa salutem animarum versari, ad id præcipue juventutem instituere, necesse habent, quod ad tales operas, quam maximè conducat. Formandi illis sunt maximè Theologi, inculcandæ virtutes Theologicæ, præ cæteris omnibus: ad perfectam vitam introducendi, in eaq; exercendi futuri Christi athletæ, cum mundo, & Diabolo, quondam pro salute animarum, & S. Matre Ecclesia decertaturi: nec tantum verbo, & opere; sed & profusione sanguinis, quod illis familiare est, pro Gloria Dei, & salute animarum enixuri. Et non tantum ita formandi sunt, ut ipsi ad talia idonei existant, sed etiam ita, ut alios erudire, & docere possint. Quæ omnia, etsi ad professionem omnium, certè nobilissimam, ut pote

qua cœlos aperiat, pertinentia, maximi sunt facien-
da: non tamen vel ipsius Dei ordinatione, omnes
ea sequi debent; relinquenda magna pars est, qui
aliam vocationem à Deo Opt. Max. impositam ha-
bentes, in ea persistant, ad eamq; se preparant. Qui
instrumenta ferrea fabricantur, non solum chaly-
bem, præstantissimum ferri genus, ad ea assumant
necesse est; sed & lentioris ferri, longè maximam
partem, adungere coguntur. Chalybs excellentia,
& duritie sua, quævis durissima (modò penetrabilia
sint) penetrat: chalybs aciem præ omnibus metal-
lis alijs, subtiliorem, ac proinde penetrabiliorem,
accipere potest; illi siue punctim, siue casim, per via
omnia: illi scalpendo cedunt, quæcunque scalpi pos-
sunt: sed hic ipse chalybs, eadem duricie sua inflexi-
bilis, ac quovis flexu violentiore accedente, fragi-
lissimus est. Huic prudentia boni artificis, lentioris
ferri, flexibilisq;, addit longè majorem quantita-
tem, quod illam chalybis aciem, ad penetrandum
protrudat, & fragilitatem ejus sua lentitudine,
ita temperet, ut illa suffulta, nullis flexionibus, fa-
cile rumpi possit: Ita ut neque chalybs, cum suo acu-
mine, & duritie magno usui esse possit, à lento
ferro separatus; neque lentum ferrum, ob molliciem
suam, & flexibilitatem, multum ad usum absque
chalybe

chalybe omnia penetrante, faceret, conjunctaq; ea tantum sint vſibus apta. Sic in diuina orbis terrarum administratione, ita Sapientia Dei ordinauit, ut ſalus generis humani & Gloria Dei, qui ſolus operum ejus finis eſt, maximè per Sacerdotium ab ipſo ordinatum, promoveatur: ſed id, ut ſubſiſtere poſſit, longè majore politicorum numero, tanquam lenticre ferro, illud ſubfulcire voluit, ita ut & in populo ſuo, vna tribu Iuda ad Sacerdotium deſtinata, vnde-
cim reliquas, ſtatui politico ſeculari, reliquerit. Ita-
que ut apud SOCIETATEM JEſu, omnia ad for-
mationem præſantiſſimorum Theologorum præci-
puè ſiunt; ita politicis futuris, ad vocationis ſue
præſidia, aliunde ſupplementa querenda ſunt. Ut
vobis chariſſimi Filij, qui in nobiliſſimo ac libero
Regno, omnino ad res gerendas nati eſtis, Politica
exercenda eſt; vobis in Patriæ officijs præſtandis
deſudandum; vobis Sereniſſimis Regibus veſtris in-
ſerviendum. Nam & tu, mi Clerice, multò plus
etiam Eccleſiæ, in Regno hoc (in quo clerus ſecula-
ris, non modò ad Rempub. pertinet; ſed poſt Regem
in ea primum locum tenet) proderis, in Reipub. ne-
gotijs, & obſequijs Regum Dominorum tuorum ver-
latus, quàm in cuculla, vel Religioſa aliqua vita, pro-
priam ſalutem querens, vel proximorum Theologicis
tantum

*tantum, non etiam politicis rationibus procurans. Eoq; magis, quod ad illam Theologicam, Ecclesie Dei
interviendi rationem, omnibus quocunq; loco natis,
aditus patet, tantumq; in illa excellere potest sutoris
filius, quantum Regis: ad hanc verò, in hoc Regno
politicam cleri secularis eminentiam, (in qua spiri-
tuales constituti, cum summa auctoritate Deo, &
Ecclesie sanctæ, utiles esse possunt) non nisi nobili loco
nati, admittantur; quos si etiam Prosapie splendore,
& Majorum imaginibus illustres, ad talem vitæ sta-
tum se convertere contingat; pro multis Theologo-
rum gregibus Gloriæ Dei, & sanctæ Matris Ecclesie
Majestati, utiles esse possunt; magnoq; damno fiat,
sitales, dum spiritualem vitam sibi eligunt, sese in
privata claustra regularium condant, & non inter
secularem clerum, in Republica versaturi, prodeant.
Hinc, Ego vos Filij charissimi, ad politicam vitam,
& quondam Rempublicam tractandam, formatu-
rus, in Scholis SOCIETATIS, occupare nolui: quæ, ex
vivocationis illorum, ad perfectionem Theologicam,
omnia dirigere, necesse habent. Verum quidem est,
quod, ut omnes scientiæ sibi conjunctæ sunt; ita &
artium istæ preparationes, quæ ad illas introdu-
cunt, ut plurimum communes existunt, ut Gram-
matices, Dialecticæ, Rhetoricæ cognitio: neque
absurdè*

absurdè etiam ij, qui ad alias facultates animum habeant, in Collegijs SOCIETATIS multa sibi utilia, ediscere possunt, unde etiam Collegia SOCIETATIS frequentissima existere, videmus: sed tamen, cum & hæc ipsa eruditionis primordia, non ita omnino diversis scientijs, & professionibus futuris, uno eodemq; modo, sint accommodata, ut non ad singulas aliter dirigenda, & accommodanda sint: Ego vos etiam in his, statim à principio institutionis, ita ut futuros politicos, & Reipublicæ administratos, Regumq; officarios, & Consultores, practicos magis, quàm theóricos, curavi erudiri. Altera causa est, quod non de Collegijs tantum SOCIETATIS, sed de omnibus Academijs, & Universitatibus, & quoquo nomine vocatis, erudiendæ juventutis officinis dicere necesse est, aliter se habere ordinationem illarum, non posse, quàm ut ita studia instituta sint, quæ etiam tenuissima ingenia non obruant: si enim vel ad mediocrium ingeniorum captum, ut excellentiora omitamus, studia proponerentur; nullis hebetioribus ingenijs erudiendis locus esset. Itaq; ut apud aurigas etiam duodecim equis, onustos currus devehentes, licet undecim sint ad gradum velociorem habiles, non tamen currus velociorem cursum tenet, quàm cui duodecimus equus, qui reliquis tardior est,

E

satisfa-

satisfacere possit : sic & in scholis tardiorum ingeniorum necessario ratio habenda est , cum jactura temporis prestantiorum. Quod ut evitarem , pro capto ingeniorum vestrorum , & in his , quæ ad finem propositum vitæ politicæ facerent , vos erudientes potius , quàm Collegijs implicandos existimavi. Et hîc de tertia causa dicendum est : quæ tota in temporis jactura , non quoad eruditionem tantum , sed & ad theoreticam scientiam in praxim , & actionem quàm primum deducendam , consistit. Ars longa , vita brevis , ait ille , sed nemini brevior , quàm his , qui ad Patriæ , Reiq; publicæ obsequia sese accingunt : qui primum cum ad ea , quæ ex liberalibus disciplinis acceperint , plurima usu , & experientia , addere necesse habeant , maturè , ac in juventute , manum operi opus est admovere ; deinde cum & laborum , & sumptuum , & periculorum , quæ omnia pro Republica rebus gerendis sese offerunt , & fortiter perferenda sunt , præmia , à Principibus quondam , & Rebus publicis expectanda sint ; ac in his multa sint , quæ meritum , non solum multitudinem , & pondus ; verum & in illis longam perseverantiam constantiamq; requirant ; arripendum à juventute tempus est , neq; multi anni in solis libris , & Theorica consumendi , sed curandum , ut
quàm

quàm primùm nos ad Rempub. & res gerendas con-
feramus. Relinquenda igitur ijs, qui alios fines stu-
diorum habent, trivialium artium, & aliarum non-
nullarum scientiarum, quæ ad politicam non faciunt,
exquisita cognitio, quæ in omnibus instituendæ ju-
ventutis officinis, plurimum temporis arripit; in
quibus non peculiaris futurorum politicorum, sed
universalis omnium, ad quarumcunq; facultatum,
& scientiarum cognitionem tendentium, vel saltem
unius præter politicam, cujuscunque ratio habetur.
Præterea ubiq; in publicis istis theatris, in tantum
omnia traduntur, & inculcantur; in quantum, non
tantum docto viro, sed Doctori aliorum futuro, sa-
tis sint, cui exquisitè artes istæ cognoscendæ sunt,
quæ olim sit alios docturus. Tempus talibus mul-
tum in addiscendis artibus, reliquum autem ætatis,
in ijsdem alijs tradendis, consumendum, pulveri-
busq; Scholasticis immoriendum est. Ita ut profe-
licitate habeatur, si quis circa annum paulò minus
trigesimum, cursum studiorum consummaverit. No-
ster verò politicus non debet in his immorari, qui
ijs artibus, non plus opus habet, quàm ut congruè,
& efficaciter sermone maximè Latino uti possit:
ad quod post jacta qualiacunq; fundamenta, expe-
rientia sola praxisq; perpetua, bonorum Authorum
lectio,

lectio, styli exercitatio, abundè sufficit; quod mille
experientia, & exempla in viris gloriosissimis, &
excellentissimis ostenderunt. In alijs autem scien-
tijs, quæ ad politicam vel parum, vel nihil faciunt,
prorsus tempus, noster politicus, non consumat, il-
ludq; ad ea summa celeritate perdiscenda, conver-
tat, quæ ad res gerendas, & Rempub. tractandam,
illi futura sunt necessaria. Et non primus Ego istius
sententia author sum; plurimi idem senserunt; sed
ut omittam alios, habetis in illo fragmento Epistola,
quod & vobis, & Præceptoribus vestris dedi, illu-
strissimi simul, atque fortissimi, sapientissimi, pru-
dentissimi, sed & doctissimi, ac ad admirationem
usque eruditissimi viri, IOANNIS ZAMOSCI gloriosæ
memoria, Regni hujus Polonia Magni Cancellarij,
& exercituum generalis Capitanei, de institutione
nobilis adolescentis, ad Rempub. educandi iudicium.
Segregat ille omnia, illi addiscenda, ab ijs, quibus
vir politicus potest nullo suo damno carere. Et vi-
dete quod judicet ille à mediocri trivialium cog-
nitione (quas & ipsas per compendia docere jubet)
intra quatuor annos, politicum omnia ad profes-
sionem suam necessaria ediscere posse; ita ut ante vi-
gesimum ætatis annum, ad Rempub. accedere, Deo,
Patriæ, Regibus, amicis, utilis esse possit; ac non
pulue-

pulveres Scholasticos terendo, sed agendo, & exercendo se, reliquum eorum, quorum tanta, quæ ibi sunt, descripta fundamenta, jecit, per se acquirere reliquo vitæ curriculo, inter res gerendas possit. Sed scribendo fessus sum. Habetis causas cur vos per semitas, & compendia, expeditiori itinere, ad finem propositum ducam, sed id non omnibus licet, magnorum sumptuum & sedulitatis res est, nec omnibus expedit, nec enim omnes ad Politicam exercendam ordinavit Deus, Vos omnes Universitates, Academies, Collegia, magni facitote, viros doctos amate & colite. Sed iterum quoniam temporis non perdendi, tanta incidit mentio, extra materiam (uti Patri cum Filijs) excurrendum mihi est. Si in artibus exquisitè discendis perdendum non est, si multa in nobilissimis scientijs, ne ad magis necessarias tempus depereat, omittenda; quid putatis, an non multo magis cavendum, ne in vanitatibus depereat, ut juvenis, parum cauta, facere solet, quæ in exterarum regiones studiorum gratia profecta, tempus in saltationibus, manualibus musicis, alijsq; nugis, vel (quod etiam pejus est) vitiosis conversationibus terit, cum offensa Dei, damno Familiarum irrecuperabili, & Reipublicæ propriæ forsitan majori, quæ dum ex illis quondam, Cives sibi utiles, expectabat, ganeones

effeminatos, ad labores pro se suscipiendos ineptos, tardosq; cum gravi suo onere, & ad felicem statum impedimento, perferat. Cavete, ne senectutem meam tali mœrore crucietis, nè ve canos meos ad inferos deducatis. Exercitia corporis ea tantum addiscite, quæ rei militari inserviant, reliquas nugas contemnite, & hominibus vanis relinquitæ. Sed quàm longè abripuit me ab istis fictis monitis SOCIETATIS JESV, hæc de ratione studiorum vestrorum, ratiocinatio. Feci hoc, ne quis, dum me tam acriter pro SOCIETATE JESV contendere viderit, & vos meos Filios, extra illorum Collegia institutos esse sciat, me quoq; hypocriseos condemnet, & ne vel vos ipsi, quos ad cultum SOCIETATIS hujus, & observantiam duco, admiremini, cur, cùm ego tanti illos faciam, vos tamen extra illorum Collegia erudiam? Sed concludamus de monitis. Cavete Filij charissimi, ne è monitis istis, si fortè in illa incideritis, veneni quid hauriatis. Falsa sunt, vana sunt, turpia sunt: quæ mendacia illa, ac ficta testimonia illis annexa turpiora faciunt, quæ à me supra refutata sunt. Pasquillus verò in fine, sub nomine profe in Iesuitarum scilicet laudem confictæ, omnis sceleris convincit. Talia talibus digna. Quæso legite in illa Patris Argenti Epistola, quæ de famosis libellis collegit,

collegit, omnium et atum gravissima judicia: immò
vellem ut incitatis ab illo libris ipsis, ea loca lege-
retis, ne vos non tantum talis libido, per famosos li-
bellos, famam alienam lacerandi, aliquando abri-
peret (quod ut rem sceleratam, vestra vobis non per-
mittet Nobilitas) sed etiam, ut ab alijs, tales turpes
scripturas editas, vna cum ipsis infamibus lucifugis,
abominemini, cum legetis tales sceleratos veterato-
res, in hoc mundo supplicij, in altero gehennæ, pro-
fano, & sacro jure, destinari. Alia nunc defessus
non scribo, post scribam. Valete Deum timentes,
& literis gnaviter operam dantes. Data Leopoli
24. Septembris, Anno Domini 1615.



Typo-

Typographus Lectori S.

DVmhanc Illustrissimi, ac Excellentissimi Domini Palatini Epistolam sub prælo habeo, & adillum locum, vbi de priori Epistola ad maiorem natu Filium, Zamosciam quondam scripta, mentio fit, pervenio; ecce nonnulli copiam ejus mihi facturos se pollicentur & præstant. habe itaq; benevole Lector vtramq;, maximè cum Illustrissimus Dominus in hac scribens ad illam, nonnulla referat. Vale.

IOAN-

IOANNES COMES
AB OSTROROG, CASTEL-
LANVS POSNANIENSIS, NICOLAO
FILIO, salutem & Paternam bene-
dictionem.

Accepi Epistolam tuam, eamq̃ primam, Ni-
colae Filii, & quidem mihi non ingratham;
tum quòd à te Filio scripta sit; tum quòd ea
scribenda, quid in literis Latinis, & liberalibus stu-
dijs profeceris, mihi testatum facere volueris. Quo-
rum causa, cum in aliam Zamosciensem Academiã,
à me missus, non exili sumptu (ne erres) sustentaris,
& in dies majori sustentandus sis: ac præter ipsam
eorum excellentiam, qua nos Deo, proximis, Patria,
Regibus, ac publicis rebus, amicis, nobis ipsis, ac toti
prorsus generi humano, utiliores reddunt, viventi-
bus vivendi commoditates præstant, morituros ad
salutis aeternæ maiorem spem erigunt, mortuis in glo-
ria vitæ aeternæ fulgorem asserunt, in mundanis vero
post se relictis, famæ perennitatem asserunt: præter
hanc, inquam, liberalium studiorum excellentiam,
cum & alias causas, quæ te, ad eorum amorem impel-
lant, non mediocriter, habeas plurimas, incumben-
dum tibi est sedulo, ne quid in te, non tractandis so-
lum

lūm (quod plurimi vel inviti faciunt) sed vehementer amandis literis, (quod verè hominis est) desiderari patiaris. Causas amandi, quas dixi plurimas esse, quæres? en tibi aliquas. Si naturam tuam spectes, homo es, rationabile animal es, tui pars præstantissima, animus est; cætera cum brutis communia. Si corpus, si illi necessaria, si ejus commoditates, si ipsæ denique voluptates, ita nobis curæ sunt, ut sunt, in dies, & momenta; quid stultius, quàm corpori misero, tandem morituro, vermium escæ putidissimæ, ac tandem luto pulverique futuro, fovendo, totos se dare? animum verò divinæ particulam auræ, solam illam Dei, ad quam creati sumus, imaginem, cœlestium quondam concivem futurum, cujus immortalitas, & miserum hoc, quod tantopere (sed communi cum brutis affectu) amamus, & curamus corpus, ad se aliquando expulvere est raptura, negligere? quid inquam stultius? At hic ipse animus liberalibus disciplinis nutritur, perpolitur, studiis fovetur, si amandus ille est, ut tui pars præstantissima, amanda & hæc: his negligendis, & ille negligitur. At quid stultius? Sed vide amplius: nec ipse negligi vult, imò nec se negligere patitur. Agit semper: annota: Et licet puer es, rem non difficilem impero, annota inquam. Nonne semper aliquid cogitas?

gitas? nonne semper imaginaris? Et nonne Et dormiens somnias? somnias enim semper, licet non omnium, quæ per somnium sese obtulerint, recorderis. At istæ sunt omnes, animi, Et ipsius animæ rationales, actiones. Nunquam otatur ille: negligi non se patitur, tu cures tantum, ne vanis, Et ociosis implicetur: hoc in tua potestate est. Atqui ad hoc liberalia studia (ad quorum amorem te adhortor) ducunt, ad hoc viri docti viam monstrant. Et ipsi præeunt, ad hoc scholæ institutæ sunt, quæ (præter præfatas commoditates) sociorum, Et condiscipulorum copia, cursum literarum, non faciliorem tantum, sed Et suaviorem, imò suavisimum reddunt. Et ludendo discitur. Suavis est literarum cursus, qui quondam ad tanta, taliæque, quæ antè diximus, perducit. Itaque natura, quæ sui amans est, seipsam ad sua commoda ducit, ad excellentiam trahit, sibi quæ ut plurimum, ipsa magistra est. Sed, ut hac in parte non sit, vide in alia. An cum bruta donec adolescant, quod unum possunt, Parentes sequantur, puero tibi non turpe fuerit, utique homini, præcepta paterna contemnere? En præceptum, ut literas non tractes solum, sed ames etiam. Hocne contemnere? Et non contempturum te quidem, jam hac tua Epistola es professus: in posterum tua te astringet nobilitas, ut quod

F 2

professus

professus es, præstes constanter & fideliter. Sed & iustitiæ id debes. | Ego tuus Pater, cui quòd es, post Deum, debes, qui te mortua matre solus enutrivit, qui educavi, qui summa sollicitudine, & cura diligenti, quicquid & Christianitatis intererat, ipsemet te institui, ac primos ingressus in viam salutis, ipsemet demonstravi, & quàm primùm per ætatem licuit, ludendo, uti puerilis ætatula tua requirere videbatur, in arenam literariam, inscium & lubentem, benignissimè introduxi: fovi deinde, promovi, ac usq; huc, hac in parte, nil in me, passus sum desiderari. Quod & agnoscis tu, dum non Patrem tantum me, sed & Benefactorem appellas. Ego inquam, tuus, & talis Pater, & tuus iste, quem dicis Benefactor, te ad hæc studia, quæ tam laudabilia, tam utilia, tam jucunda sunt, ad quæ ipsa natura & incitat, & ducit, ad quæ non facilis tantum aditus est, sed & decursus suavis, in quo ipse labor plurimus (si modò labor) delectat plurimum: ad hæc, inquam, non tractanda solum, sed amanda etiam, Ego te hortor, Ego moneo, Ego omnes commoditates suppedito. Injustus sis, si pro omnibus meis beneficijs, quod unum potes, non rependeris, ut mihi obedias. Et qua in re obedias? in ea, quæ tibi, quàm mihi, fuerit utilior. Mihi certè, hac mea, de te, sollicitudine, pauca quaruntur,

runtur, magna ea quidem, sed & ea ipsa, vel tecum
communis, vel & tibi talia. Apud Deum aliquid,
te benè educando cupio promereri? sed & tu, meis
auspicijs benè educatus, facilius promereberis. Fa-
mam Patriæ primum, deinde Gentis nostræ in te in-
signiter instituto, ac Cive benè formato, augere sat-
ago? at hoc tibi mecum commune est, & tua quidem
pars potior: plus est gloriæ, insignis si quis ipse est,
quàm si insignem Filium habeat. Reliqua, quæ ex
liberalibus studijs promanant commoda, tibi sunt
propria. Mibi jam & ætas grandiuscula imminet,
sed morbosæ valetudine, diversis difficultatibus at-
trito, cum infortunijs diversis colluctato, vita lon-
gior vix est speranda: quam quandocunq; Deus, &
hujus, & melioris vitæ dator, mihi abruperit, ut in
te vivam omnibus virtutibus prædito, erga Deum
Creatorem tuum pio, Religionis Catholicæ cultore
constantissimo, in Patriam Cive amantissimo, Legum
patriarum observantissimo, erga Regem, ac Domi-
num tuum, subdito fidelissimo, ab omnibus tumult-
ibus, turbis, mutationibus, ac ipsis turbatoribus,
alienissimo, pacis & tranquillitatis publicæ tuendæ,
ferventissimo, cum Amicis amicitia tenacissimo, ini-
micis inimico reconciliabili, omnium denique virtu-
tum, Gentis & Majorum tuorum, memore Filio, id

unicè & vivens, & moriens opto! Ego quidem viam
hanc virtutis, à Majoribus nostris traditam, fide
bona prævi: fortuna, si laboribus & studijs meis, non
satis respondisse visa fuerit, quid egerim, non quibus
successibus, considerabis. Luctam mihi Deus optimus
Maximus cum omnibus difficultatibus & adversita-
tibus, domi forisque destinaverat: odia, inimicitias,
supplantationes, damna varia, & ingentia, quæ ta-
men omnia summa uti colluctatione; sic & constan-
tia, ita sustinui, ut si (quod unum supererat) vale-
tudinem integram mihi reliquam fecisset, supera-
turus etiam viderer, ac ne nunc quidem, licet in dies
afflictiori sim, succumbam. Certè quantum quan-
tum hujus misere vitæ superest, ne ulli meo officio
desim curabo: & ut tibi moriens vel illud occinam:
Virtutem ex me disce, verumque laborem, fortunam
ex alijs. Sed quorsum hæc? & ad puerum Filium.
Primum est, ne te eò impellere videar, quod ipse de-
clinaverim. Alterum, si ea de qua dixi, mea mor-
bositas, me citius absumpserit, quàm ut tibi ad ma-
turiorem ætatem provecto, paterna institutione præ-
cepta dare possim, quàm, si secutus fueris (ut certè
teneris) utriusque vitæ felicitàtem, facilius es
consequuturus. Reliquum est, ut tibi ad alteram.
Epistolæ tuæ partem respondeam, in qua de tuis rebus

Baco-

Bacovium mihi relaturum scribis: Retulit is, & quidem pauca quædam necessaria, usu attrita vel consumpta, tibi deesse video. Tamen pro mea in te benignitate, non ea tantum mitto; sed & alia etiam, ad ornatum tibi futura. Sed & hic admonendus iterum es: & cum videris ista, tam pulchra, tam elaborata, & certè preciosa, quæ tibi à me mittuntur; imagineris tibi, equum pulchrum ac præstantem, & asinum rudem ac ignavum: imagineris phaleras insignes, auro gemmisque distinctas, operis exquisitis elaboratas, atque cogita: si phaleras istas equo generoso convenientes, asino quis imponeret, an non risum omnibus concitaret? an non pro stulto, & stolido condemnaretur? certè condemnaretur. Cave igitur ne quis, & me stultitiæ condemnet, si ea quæ tibi mitto ornamenta, indigno missa viderentur. Non corpus hoc tuum, quod tibi commune est, etiam cum brutis, exorno; sed quemadmodum in equis pulchritudinem (quæ plerunque genus, in hoc animali consequitur) & generositatem, ac eorum, ut ita dicam, virtutem admiramur, talèsque phalaris insignibus, dignos judicamus; sic Ego his ornamentis tibi mittendis, ornandum duxi primò genus ac Nobilitatem tuam, quam in hac Patria nostra (absit invidia dicto) certè nulli secundam habes.

Et hac

Et hac quidem in parte, nemo te asini, nemo me stultitiae condemnaverit, qui præter Gentis nostræ, cum omnibus antiquissimis, parem in hoc Regno antiquitatem, sciverit te Matre Mielecia natum, Aviam alteram Teczyniam, alteram Radziwilam, habuisse: at Deus bone, quales quantasque non Natalibus tantum, sed virtutibus (iisque supra sexum heroicis) foeminas! multos etiam nunc habes, qui noverant & admirabantur: qui sciuerit præterea te per Proavias ac Abavias Koscielecios, Lascos, Szydłowecios, Kolas, Kucinios, Odrowosios, Polubinscios, (& magna sunt hæc in Patria hac nostra fueruntque nomina) inter cognationes & agnationes, & ipsos ac eorum Familias, & infinitum ferè præcipuæ Nobilitatis Regni hujus per varias, & istarum familiarum, & propriæ Gentis nostræ, Foeminis elocandis, acquisitas Affinitates, connexum numerum numerare: imò & per Ducissam Ratiboriensem (quæ Abavia tua fuit) ipsum Poloniæ Regum ac Principum, ipsiusq; Praelati sanguinem ingenitum habere. At hoc unum tantum est, ut & in equo eleganti, plus spei est: sic & de te (quod alterum est) spem habeo à Majorum virtute non te degeneraturum. Et ideo te ut in omnibus ingenue educo; ita & his ornamentis politiolem reddere volo. Sed cave, ne hic in asinum desinas, eoque rudiorē,

diorem, & fuste digniorem, si nobilissimo sanguine
 cretus, summa diligentia à Patre educatus, in am-
 plissimum liberalium studiorum & virtutum insti-
 tuendarum, Emporium missus, in viam virtutis &
 vestigijs Majorum tritam, & optimarum disciplina-
 rum institutis septam, introductus; in fœdissimum vi-
 tiorum barathrum te demittas: Quod quantò magis
 cavere volueris, (debes autem quam maxime) tan-
 tò alacrius diligentiusque literis incumbe, atque in-
 vigila: quarum studia, quid possint? quid efficiant?
 remitto te, ad Marcū Tullium Ciceronem pro Archia
 Poëta perorantem, ut tibi, non philosophando tan-
 tum persuadere velle videar, vel te auctoritate Pa-
 terna premere, sed vide apud Authorem gravissimū
 venerandæ antiquitatis de literis & earum studijs
 iudicium. Et tale omnium sapientum, omnibus æta-
 tibus, & in omnibus orbis terrarum partibus fuit.
 Vale. Nostri Domestici, te salutant omnes. Vale
 iterum. Komarnæ. 3. Decembr. Anno 1606.



G

EPISTO-

EPISTOLA EIVSDEM IL-
LVSTRISSIMI DOMINI PALA-
TINI, AD REVERENDVM PATREM
SIMONEM SOCIETATIS IESV.

ADMODVM REVERENDE PATER
SIMON, amice carissime.

Quandoquidem Epistolam istam, quam ego filio-
rum meorum priuatim monendorum causa scrip-
seram, visum fuit superioribus publicam facere, est
quod me malè habeat, eam negligentia typographi
adeò esse depravatè impressam. Illius quidem iner-
tia, maleq; sobria circa artem suam id cura imputa-
bitur. Sed si ita in manus hominum non correctæ ex
Collegio Leopolicensi erumperet, ne Reverentia Vestra
quidem excusabiles viderentur, si paterentur tam
turpiter depravatam scripturam in typographia sua
impressam inter homines vagari. Tot docti viri fe-
rent, in notam negligentia nescio cuius incurrere?
Ego licet satis habuerim me ad filios scripsisse, tamen
cum mihi R^{ti}a. V^{ra}. ab admodum Reverendo Patre
Reçtore impressam hanc epistolam, unà cum dedica-
toria sua attulit, ferre non potui, quin statim corri-
gerem, neq; ullum exemplar ab ullo hominum incor-
rectum videri passus sum. Manu scriptum exemplum
Episto-

Epistolæ hujus nullum mihi est: quod manu mea scripsi,
dudum filiis transmissi. Sed tamen quomodo hos typo-
graphi errores correxerim, mitto exemplar Ruz. T^a.
calamo in istis exemplaribus impressis correctum, ut
Et ego in istis, quæ mihi attulit, feci, corrigi ista er-
rata possunt, supervacanea intrusa exscalpi vel ex-
pungi, omissa inscribi, non adeò magnus labor est.
Voluissem, ut hoc scriptum meum in solis filiorum
meorum, ad quos scriptum est, penetralibus delite-
sceret; sed postquam visum est illud publicum fa-
cere, rogo, ne incorrectum in lucem prodeat. Valeat
Ruz. T^a. Et me suis commendet. Drohovichio 13. No-
vembr. 1615.

Ruz. T^a. amantissimus

JOANNES COMES ab Ostrorog
Palatinus Posnaniensis.



EPISTOLA REVERENDI
PATRIS ANDREAE KANSKI,
AD ILLVSTRISSIMVM DOMINVM PALA-
TINVM POSNANIENSEM.

ILLVSTRISIME ET EXCELLEN-
tissime Domine Domine Colendissime.

PAX CHRISTI.

DUO sunt, quae Epistolam Illustrissimae Excellen-
tiae V^{rae}. tot mendis ac erroribus fecerunt sca-
tere. Incuria typographi, & unus è nostris festina,
& nimium fortasse attenta, sed praeceptis diligentia,
qui & inertis typographi molestiam ferre amplius
non potuit, & exemplo sibi tradito, magis quam par
erat, adhaesit. Ita enim factum est, ut dum in verba
minus correcti exempli iurasset, tot menda disimu-
lando dispungere neglexisset. Labor hic (dolendum)
quod ceteros latuerit, & unus curae traditus fuerit,
mundiore enim ex castigatione censura lucē aspexis-
set. Ita rem secretam R. Pater Rector haberi vo-
luit, ut uno vix conscio typis mandaret. Sed ubi è
prælo emerfit, & in lucem nostrorum venit, mox casti-
gata, dispuncta, mundior quam in prælo nata, in ma-
nus aliorum transmissa est, idemq; etiam nunc est la-
bor in ceteris exemplaribus corrigendis. Spero brevi
restituendam suae dignitati & splendori, meliori in
Germa-

Germania typographorum opera, & puriorem olim
inserendam Nostræ Societatis Annalibus, ad eter-
nam Illustrissimæ Excellentie V^{ra}. memoriam
alendam, & singularem erga Societatem amorem
deprædicandum. Id laboris Illustrissimæ Excel-
lentie V^{ra}. premium habitura est, dum autori-
tate Illustrissimæ Excellentie V^{ra}. se defensam,
Societas testabitur, & ob id Illustrissimæ Excel-
lentie V^{ra}. gratias immortales, & Illustrissimæ Ostro-
rogorum Genti summum deberi amorem, & nova
apud Deum vota & supplicationes, suam illa poste-
ritatem admonebit. Deum precor ut Illustrissimam
Excellentiam V^{ram}. nobis diu salvam & florentem
conseruet. Leopoli die 15. Novembr. 1615. Re-
verendus P. Rector noster necdum redijt. Pater
SIMON, ut primum ab Illustrissimæ Excellentia V^{ra}.
venit, febris decubuit, ut ideò me qui sum loco R. P.
Rectoris relictus, Illustrissimæ Excellentie V. re-
scribere oportuerit.

Illustrissimæ & Excellentissimæ D.V.

Humilis in Christo servus.

ANDREAS KANSKI.

EPISTOLA EIVSDEM IL-
LVSTRISSIMI DOMINI PALA-
TINI, PATRIS, AD COMITEM STANI-
SLAVM FILIVM, CLERICVM.

CHARISSIME FILI.

A *Lijs de rebus ad Comitem Nicolaum fratrem
majorem scribo: ad te de illa Epistola, quam nu-
per admonendi vestri gratia ad utrumq; vestrum
misi. Ex præfatione Patris Rectoris Collegij Leopo-
liensis Societatis Jesu, quid factum sit, intelligetis
(mitto enim aliquot exemplaria) sed adeò mendosè
typographus illorum hanc epistolam, vel duas potius
excudit, ut in brevi scripto triginta quatuor menda
repererim, cum mihi expressa exemplaria nescio quot
cum deprecatione misisset. Primò, non admodum
mihi placet, meas ad vos familiariter scriptas epi-
stolas prælo subdi. Deinde, cum jam ita placuisset,
optassem saltem ita imprimi, ut à me scriptæ sunt:
licet homine nil minus quàm scriptore: qui vitam
agendo, non scribendo consumpserim, & in ea statione
à Deo & Rege in hac Repub. sim constitutus, ut ca-
lami exercitia, omninò ad vocationē meam non per-
tineant. Nullum mihi exemplum fuit, præter id, quod
ad vos manu mea scriptum misi, unde non sine magna
molestia*

28

molestia hoc mendosum exemplar corrigere potui,
quod cum illo autographo meo conferetis, ipsi facile
animadvertetis. Et id mihi vebementer displicet,
quod iste Pater KANSKI scribit, illos has epistolas cor-
rexisse, optassem à nemine alio quàm à me (quando-
quidem jam in lucem proruperunt) correctas fuisse:
Et præstiti operam, licet in maximis Et gravissimis
negocijs, pro consuetudine vocationis meæ occupatus,
ut colligetis ex exemplo epistolæ meæ ad Patrem SI-
MONEM, qui mihi à Patre Rectore hæc exemplaria
attulerat, quæ vobis mitto, ad quam hic Pater KANSKI
per hanc suam respondet. Scribo ad illum rogando,
ut statim impressam correcturam meam propriam,
mittant ad eos, ad quos illa exemplaria ab alijs cor-
recta trans miserunt, nevé patiantur, ullibi alia
correctura prælo subdi, præter eam quam illis trans-
misi, Et quam in istis exemplaribus impressis vide-
bitis. Gratulari debes, mi fili, uti juvenis clericus
ex Gente nostra, armisq; Naleciorum in majori Po-
lonia præcipua dignitatis loca occupasse, cum nunc
gentilis noster Nalencius ad Archiepiscopatum
Gneznensem evectus sit, qui licet totius Regni Pri-
mas, Et primus Princeps est, tamen majoris Poloniæ
Senator est, Et in Clero majoris Poloniæ primus.
Quemadmodum jam ante ego inter Senatores majoris
Poloniæ

Poloniae seculares primum locum tenui, uti & Illu-
 strissimus Dominus Palatinus Leciciensis Capita-
 neatum Generalem majoris Poloniae. Ita ut nunc
 omnes tres, qui Spirituali, Senatorio, & Equestri sta-
 tuti in majori Polonia praeimus, Nalencij gentiles
 simus. Securus sis, te majore etiam benevolentia
 modernum Illustrissimum Dominum Primatem com-
 plexurum esse, quam nuper defunctum, licet huius
 maxima sit prosecutus. Sed vale jam, & curis
 gnave operam nava. Drobovisio. 14. No-
 vembr. 1615.

Tui amantissimus Pater

JOANNES COMES ab Ostrorog
 Palatinus Posnaniensis.

BIBLIOTH. UNIV.



JAGELLONICAE

F I N I S.



u-
a-
oc
a-
es
ia
n-
is
is
o-
g

15
15
15

Biblioteka Jagiellońska



stdr0010168

